

**BASES DA SEGUNDA EDICIÓN DO CONCURSO REACCIÓN POLO CLIMA ,DIRIXIDO Á  
MOCIDADE DA PROVINCIA DE PONTEVEDRA, ANO 2021**

Cada 24 de outubro conmemórase en todo o mundo o Día Internacional contra o Cambio Climático, unha festividade instaurada pola Organización das Nacións Unidas para paliar os devastadores efectos que se están producindo nos últimos anos en todo o planeta.

O cambio climático é o maior desafío do noso tempo e agora atopámonos nun momento decisivo. Desde pautas meteorolóxicas cambiantes, que ameazan a produción de alimentos, ata o aumento do nivel do mar, que incrementa o risco de inundacións catastróficas, os efectos do cambio climático son de alcance mundial e dunha escala sen precedentes. Se non se toman medidas drásticas desde hoxe será máis difícil e custoso adaptarse a estes efectos no futuro.

As organizacións dirixidas por persoas novas necesitan fomentarse e empoderarse a participar na posta en práctica de políticas públicas de maneira local, rexional e nacional da Axenda 2030. A mocidade xoga un papel significativo na implementación, vixilancia e revisión da Axenda, así como en responsabilizar os gobernos. Con compromiso político e recursos adecuados as e os mozos teñen o potencial de facer máis efectiva a transformación do mundo nun lugar mellor para todas as persoas. Neste contexto a mocidade ten moito que dicir, polo que a Deputación de Pontevedra, a través do Servizo de Cohesión Social e Xuventude, convoca a segunda edición do concurso Reacción polo Clima, que se rexe polas seguintes:

### **BASES REGULADORAS**

#### **Primeira. Obxecto**

Aprobar as bases reguladoras da segunda edición do concurso Reacción polo Clima, que ten como finalidade promover a loita contra o cambio climático a través de manifestacións artísticas visuais nas que se denuncie a situación do planeta e se propoñan actuacións para combater a contaminación, entre outros aspectos, e, deste xeito, potenciar o talento da mocidade e mostrar as súas reivindicacións neste ámbito.

## **Segunda. Persoas destinatarias**

Poderán optar a estes premios as persoas físicas e xurídicas que cumpran os seguintes requisitos:

- **Persoas físicas**
  - Ter unha idade comprendida entre os 16 e os 30 anos na data de presentación da solicitude
  - Estar empadroadas en calquera dos concellos da provincia de Pontevedra
- **Persoas xurídicas**
  - Ser entidades que teñan a súa sede fiscal na provincia de Pontevedra
  - Que polo menos o 50 % das persoas administradoras ou membros da xunta directiva sexan persoas físicas con idades comprendidas entre os 16 e os 30 anos

## **Terceira. Premios e formato**

3.1 Os premios convocados están dotados cun importe de catro mil (4.000,00) euros:

- Primeiro premio: 2.400,00 euros
- Segundo premio: 1.000,00 euros
- Terceiro premio: 600,00 euros

3.2 Os traballos serán en formato audiovisual e admitirase calquera tipoloxía empregada pola mocidade nas redes sociais ou nos medios de difusión de natureza similar (por exemplo, Instagram, TikTok, YouTube etc.)

3.3 A duración máxima do vídeo será de dous minutos e medio

3.4 A institución provincial queda eximida de calquera responsabilidade derivada do plaxio ou de calquera outra transgresión da lexislación vixente relacionada coa propiedade intelectual na que poidan incorrer as persoas participantes

#### **Cuarta. Proxectos excluídos**

Quedan excluídos do concurso:

- Os proxectos que non cumpran os requisitos establecidos nas bases segunda e terceira
- Aqueles con contidos que poidan atentar contra a imaxe, intimidade e honra das persoas ou institucións
- Os que sexan discriminatorios desde o punto de vista do xénero e/ou da raza
- Aqueles que empreguen imaxes de menores con contidos que poidan constituír un delito

#### **Quinta. Orzamento**

A contía consignada para estes premios ascende a catro mil (4.000,00) euros, con cargo á aplicación 21/231.2311.481.01 do Orzamento provincial.

### **PROCEDIMENTO PARA A PRESENTACIÓN DE SOLICITUDES E PROXECTOS**

#### **Sexta. Prazo e lugar de presentación de solicitudes**

6.1 As persoas interesadas en participar poderán presentar a súa solicitude, preferiblemente por vía electrónica, a través do formulario normalizado dispoñible na Sede electrónica da Deputación de Pontevedra, <https://sede.depo.gal>.

Para a presentación das solicitudes a Sede electrónica da Deputación de Pontevedra admite os certificados electrónicos do sistema Cl@ve, que contempla a utilización de sistemas de identificación baseados en claves concertadas (sistemas de usuario e contrasinal) e certificados electrónicos (incluído o DNle).

6.2 Opcionalmente (no caso das persoas físicas), as solicitudes poderán presentarse presencialmente en calquera dos lugares e rexistros establecidos na normativa reguladora do procedemento administrativo común, utilizando o formulario normalizado dispoñible na Sede electrónica da Deputación de Pontevedra, que, unha vez cuberto, xerará a solicitude en formato PDF, que se deberá imprimir e asinar para a súa presentación presencial.

6.3 As bases publicaranse conxuntamente co seu extracto no *Boletín Oficial da Provincia de Pontevedra* (BOPPO) e na Base de Datos Nacional de Subvencións (BDNS).

O prazo de presentación das solicitudes e proxectos será de 2 meses contados a partir do día seguinte ao da súa publicación.

6.4 Admitirase só unha solicitude por cada persoa física ou xurídica participante.

#### **Sétima. Comprobación de datos**

7.1 Para a tramitación deste procedemento consultarase automaticamente os datos incluídos nos seguintes documentos elaborados polas administracións públicas:

- NIF das persoas físicas ou xurídicas solicitantes
- NIF das persoas representantes, no seu caso
- Certificado de residencia das persoas físicas solicitantes
- Domicilio fiscal, no caso de persoas xurídicas
- Así mesmo, comprobarase que as persoas, entidades ou empresas participantes estean ao corrente das súas obrigas coa Axencia Estatal Tributaria, coa Facenda autonómica, coa Seguridade Social e coa Deputación de Pontevedra

7.2 No caso de que as persoas interesadas se opoñan ás devanditas consultas deberán indicalo no cadro habilitado no formulario de inicio e achegar os documentos correspondentes.

7.3 Excepcionalmente, no caso de que algunha circunstancia imposibilitase a obtención destes datos poderáselles solicitar ás persoas interesadas a presentación dos documentos correspondentes.

#### **Oitava. Documentación**

As persoas interesadas deberán presentar a solicitude de iniciación dispoñible na Sede electrónica da Deputación de Pontevedra. Nesta solicitude as persoas interesadas deberán indicar a URL de acceso de descarga dos contidos do proxecto que opte aos premios.

## **Novena. Trámites administrativos posteriores á presentación de solicitudes e as súas emendas**

9.1 Todos os trámites administrativos que as persoas interesadas deban realizar durante a tramitación deste procedemento faranse preferiblemente por medios electrónicos a través do modelo “instancia xenérica”, dispoñible en <https://sede.depo.gal>.

Opcionalmente (no caso de persoas físicas), tamén poderán tramitarse presencialmente en calquera dos lugares e rexistros establecidos na normativa reguladora do procedemento administrativo común.

9.2 Se a solicitude non reunise os datos esixidos na convocatoria ou calquera dos previstos no artigo 66 da Lei 39/2015, do procedemento administrativo común das administracións públicas (LPACAP), requiriráselle á persoa interesada, de conformidade co establecido no artigo 68 desta, que nun prazo de 10 días hábiles emende as faltas ou presente os documentos preceptivos, indicándolle que, de non o facer, terase por desistida a súa solicitude, que se arquivará sen máis trámites.

## **Décima. Xurado**

10.1 A selección e concesión dos premios obxecto desta convocatoria realizarase segundo a proposta dun xurado nomeado e presidido pola presidenta da Deputación ou pola deputada ou deputado en quen delegue.

O xurado estará integrado por representantes da Deputación dos servizos de Cohesión Social e Xuventude, Comunicación Institucional e Medio Natural, que axustarán a súa actuación ao disposto para os órganos colexiados na Lei 40/2015, do 1 de outubro, de réxime xurídico do sector público.

Na composición do xurado procurarase que haxa unha presenza equilibrada de mulleres e homes.

En todo o que non estea previsto nestas bases o xurado queda facultado para resolver as dúbidas que se presenten e adoptar os acordos que se estimen necesarios para o efecto.

10.2 A composición do xurado farase pública na páxina web da Deputación de Pontevedra, [www.depo.gal](http://www.depo.gal), unha vez finalizado o prazo de presentación de proxectos.

Unha vez revisadas as solicitudes por parte do Servizo de Cohesión Social e Xuventude, as que non cumpran os requisitos establecidos nestas bases non serán admitidas a trámite e ditarase a oportuna resolución. As demais solicitudes remitiráselle ao xurado, que examinará e valorará as diferentes obras, propoñerá a adxudicación dos premios e redactará a proposta de resolución, que quedará recollida nunha acta.

#### **Décimo primeira. Publicación de actos**

A resolución derivada da decisión do xurado farase pública no BOPPO, de conformidade co establecido no artigo 45 da LPACAP.

Así mesmo, tamén se publicará na páxina web da Deputación de Pontevedra ([www.depo.gal](http://www.depo.gal)).

#### **Décimo segunda. Proxectos premiados**

Os proxectos premiados quedarán en posesión da Deputación, que poderá levar a cabo as accións que considere oportunas para a súa difusión, pero sempre facendo constar a autoría.

As persoas participantes aceptan, coa presentación dos seus proxectos a estes premios, colaborar con esta institución nas accións de difusión que se organicen e a cesión dos dereitos de edición á Deputación.

O feito de participar nestes premios supón a autorización das persoas participantes para expoñer, reproducir ou publicar a imaxe ou o contido das obras presentadas por calquera medio que se estime oportuno, sen máis limitacións que as derivadas do Real decreto legislativo 1/1996, do 12 de abril, polo que se aproba o Texto refundido da Lei de propiedade intelectual.

Tras a publicación da resolución derivada da decisión do xurado, as e os gañadores deberán achegar a certificación do número de conta bancaria na que se ingresará o importe de cada un dos premios. Así mesmo, de acordo co establecido no artigo 101 da Lei 35/2006, do 28 de novembro, do Imposto sobre a renda das persoas físicas, a retención que se lles practicará ás persoas premiadas que sexan persoas físicas será do 15 % do importe.

No suposto de ser menor de idade, a nai, o pai ou a persoa que exerza a súa titoría legal deberá indicar que autoriza a Deputación a pagar o premio, no caso de que se lle concedese.

#### **Décimo terceira. Proxectos non premiados**

A devolución dos proxectos presentados e non premiados efectuarase, a petición das súas autoras ou autores ou das persoas debidamente autorizadas, no prazo dun mes, contado desde o momento en que se faga pública a decisión do xurado.

Unha vez transcorrido ese prazo sen que estes se retirasen, entenderase que as súas autoras ou autores renuncian á súa devolución a favor da Deputación, que poderá destruílos ou darlles o destino que considere máis oportuno.

Para a retirada dos proxectos, que será sempre por conta da autora ou autor, deberá acreditarse a titularidade do proxecto solicitado mediante a presentación do DNI; no caso de que o recolla unha persoa distinta, esta deberá estar debidamente autorizada pola candidata ou candidato e terá que presentar un escrito de autorización e exhibir o DNI de ambos.

#### **Décimo cuarta. Incumprimento das bases**

A falsidade nos datos achegados polas persoas participantes no concurso dará lugar á exclusión inmediata do proxecto presentado. Se esta falsidade se puxese de manifesto tras a resolución do concurso e o proxecto afectado resultase premiado, o premio obtido quedará sen efecto e se reintegrarán, no seu caso, as cantidades percibidas por tal concepto.

#### **Décimo quinta. Autorización para a difusión de imaxes**

No formulario de solicitude as persoas solicitantes poderán autorizar ou denegar expresamente a toma de imaxes que se poidan realizar na entrega dos premios (se se tratase dun acto público), que poderán ser obxecto de publicación por parte da Deputación de Pontevedra.

#### **Décimo sexta. Réxime xurídico**

Esta convocatoria rexerese por estas bases reguladoras. De forma supletoria, aplicarase o disposto na Lei 38/2003, de 17 de novembro, xeral de subvencións; a Lei 9/2007, de 13 de xuño, de subvencións de Galicia; a Ordenanza xeral de subvencións da Deputación de Pontevedra, aprobada polo Pleno da Deputación de Pontevedra na súa sesión ordinaria, de 28 de outubro de 2016, e publicada no BOPPO núm. 249, de 30 de decembro de 2016; as bases de execución do Orzamento vixente da Deputación de Pontevedra; e demais normativa de aplicación.

Así mesmo, rexerese pola Lei 39/2015, de 1 de outubro, de procedemento administrativo das administracións públicas; pola Lei 40/2015, de 1 de outubro, do réxime xurídico do sector público e polas demais normas de dereito administrativo e, na súa falta, polas normas de dereito privado.

#### **Décimo sétima. Recursos**

Contra o acordo de aprobación destas bases, que pon fin á vía administrativa, poderase interpoñer un recurso potestativo de reposición ante o mesmo órgano que o ditou, no prazo dun mes a partir do día seguinte ao desta publicación (artigos 112, 123 e 124 da LPACAP), ou ben, directamente, un recurso contencioso-administrativo ante o Xulgado do Contencioso-Administrativo de Pontevedra, no prazo de dous meses, establecido no artigo 46 da Lei 29/1998, de 13 de xullo, reguladora da xurisdición contencioso-administrativa. Todo iso sen prexuízo de que se poida interpoñer calquera outro recurso que se estime conveniente.

#### **Décimo oitava. Protección de datos**

Os datos persoais obtidos neste procedemento serán obxecto de tratamento pola Deputación de Pontevedra, en calidade de órgano responsable, coa finalidade de xestionar este procedemento, verificar os datos e documentos que a persoa interesada declare na súa solicitude para comprobar a súa exactitude e levar a cabo todas as actuacións administrativas que, no seu caso, deriven.

A lexitimación para o tratamento baséase no cumprimento dunha tarefa de interese público ou no exercicio de poderes públicos de acordo coas normas de rango legal recollidas no apartado "normativa aplicable", dispoñible na ficha de procedemento en <https://sede.depo.gal>, e o consentimento explícito das persoas interesadas.

Os datos persoais obtidos neste procedemento serán obxecto de comunicación ás administracións públicas no exercicio das súas propias competencias ou cando sexa necesario para que a cidadanía poida acceder de forma integral á información relativa a unha materia e ao público xeral, dada a publicación de actos prevista.

As persoas interesadas poderán acceder, rectificar e suprimir os seus datos, exercer outros dereitos ou revogar o consentimento segundo o previsto en <https://depo.gal/proteccion-de-datos/exercicio-de-dereitos>.